

QK 274.17

Stauffenberg,



11 F. 2. 111

QK. 274.

Cat. IV, 545.



Der Spruch des Apostels

Hebr: XIII.

Gedencket an eure Lere etc.

Ausgelegt

Bei der Christlichen

Begrebnus des weiland Ehrwürdigen

und wolgelarten M. CHRISTOPHORI

Stauffenbuels/Diaconi der Kirchen

S. Andrea zu Eissleben/

Durch

M. Hieronymum Mencilium

Superintendenten.

15



85

Wittenberg/

Gedruckt durch Clementem Schleich



Handwritten text, likely bleed-through from the reverse side of the page. The text is mirrored and difficult to decipher but appears to include a title and author information.



# Dem Erbar vnd

wolweisen Herrn Jacob Stauffenbuel/  
Bürger vnd Rathman der Alten Stadt Eisle-  
ben / meinem freundlichen lieben Herrn  
Geuattern/

Wünsche ich Gottes Gnade vnd Segen  
in Christo Jesu vnserm waren vnd  
einigen Heilande zuuor/

**G**erbar / Wolweiser vnd  
freundlicher lieber her geuatter/  
Es hat mir vnser lieber her Gott/  
diese zeit vber/weil ich vnwürdiger  
Pfarherr vnd Superintendens  
hie in Eisleben/zu S. Andreas gewesen/viel mei-  
ner lieben Collegen vnd fürtreffliche Menner  
von meiner seiten hinweg genommen / die den mei-  
sten theil jünger vnd viel stercker denn ich anzuse-  
hen gewesen.

Als ich erstlich aus S. Niclas pfar herauff  
beruffen ward / fand ich am Caplan dinst / den  
herrn M. Andream Theobaldum / sonst M.  
Mercker genant / M. Georg Morgenstern / wel-  
cher auch im Schlosse mit zu gleich das Hofe pre-  
digamt inne hatte / vnd Magister Zachariam  
A ij Praecto

Prætorium/ die waren meine ersten Caplane / vnd  
war zu inen auch Wilhelmus Sarcerius ange-  
nommen.

Anno 1565. wie die gewolliche pestilenz einfiel/  
stirbt an derselben seuche hinweg Magister Ge-  
org Morgenstern/sampt seinem weibe / sechs kin-  
dern / vnd zweien dienstmeiden.

Anno 1564. das Jar für ist gedachtem ster-  
ben/ zeucht M. Zacharias Prætorius in Oster-  
reich / vnd bleibet alda bis ins vierde Jar / vnd  
wird Herr David Schesser an seine stadt zum  
Caplan in vnser kirche beruffen.

Dieser vorscheidet anno 1567. den 12. Octo-  
bris/vnd weil M. Prætorius wider aus Osterreich  
komen war / ward er auff sein embsigs anhalten  
vnd anderer intercession / in seine vorige stadt ge-  
setzt vnd angenommen/anno 1568.

Nach obgedachts Herrn M. Georg Mor-  
gensterns tode / ist Wilhelmus Sarcerius im  
Schlosse Hoffprediger vnd Caplan zu S. An-  
dreas blieben/bis er anno 1568. zum Pfarhern  
zu S. Peter angenommen worden ist.

Anno 1569. eben mit dem anfangе desselben  
newen Jares/vorscheidet M. Andreas Mercker/  
nach dem er vnser Schulen vnd Kirchen in die 27.  
Jar treulich vnd wol gedienet hatte.

Nach Magister Merckers tode/wird aus der  
Newstadt

Neustad von S. Annen / in unsere Kirche beruf-  
fen M. Heinrich Rothe / Anno 1569. den 20. Julij,  
diesem trette ich mit bewilligung M. G. Herrn  
das Pfaramt gutwillig abe / welches er vorwaltet  
hat / bis auff das 1575. Jar / in welchem er den 6.  
Maij verschieden ist.

Nach ime wird Herr Bartholomeus Ger-  
hard (dazumal entsetzter Hoffprediger zu Wei-  
mar) beruffen / vnd anno 1575. den 20. Sonntag  
nach Trinitatis / welcher war der 10. Octobris ein-  
geweiset / der blieb lenger nicht denn ein Jar / vnd  
hatte auch das Pfaramt inne / Er ward aber  
wider gen Weimar erfordert. Nach seinem ab-  
zuge / habe ich das Pfaramt wider zu mir geno-  
men / vnd habe es mit den Caplanen bey voriger  
ordnung bleiben lassen / das nicht mehr ein son-  
derlicher Pfarherr zu S. Andreas were / sondern  
neben dem Superintendenten drey Caplane ge-  
halten wurden.

Als aber (wie zuvor auch gedacht) Wilhel-  
mus Sarcenius / aus unserer Kirchen hinab zu  
S. Peter kommen / ist nach ime vnd an seine stad /  
anno 1568. M. Johan Stam von Bornstedt  
zum Caplan in S. Andreas Kirche gesetzt wor-  
den / vnd ist das Hoffprediger ampt im Schlosse  
gefallen / weil man dieselbe zeit keine Hoffhaltung  
mehr darinne hatte. M. Stam aber wird das

A iij folgen

Born  
stirn

folgende Jar / wie M. Heinrich Kothe / nach M.  
Merekers tode herein beruffen war / in S. Annen  
Kirchen zum Pfarherrn beruffen. Ime aber succe-  
diret M. Georg Biber / welcher zuvor zu S. Ni-  
clas Caplan war. Als aber derselbe anno 1573.  
im October gen Urtern zeucht / vnd alda das  
Pfaramt annimpt / kompt mein lieber Vetter  
M. Friederich Kothe zum Caplan dienste / vnd  
als M. Zacharias Prætorius / vmb fürgefallenen  
streits willen / seinen vrlaub selbst nam / wird Er  
an seine stedte gerucket.

Diese zeit wird / mein auch lieber Vetter  
Georg Kraud von Rissdorff auffm Berge / her-  
ein zum Caplan beruffen / vnd an M. Friederich  
Kothens stadt gesezet / das geschicht im Herbst an-  
no 1575. vmb Galli. Entlich wie M. Friederich Ko-  
the (als Herr Bartholomeus Gerhart / wie ob-  
gedacht / wider gen Weimar kommen) zum Archi-  
diacono angenommen ist anno 1576. den 24. Octo-  
bris / herr Georg Kraudt an seinen ort fortge-  
ruckt / vnd mein auch lieber Vetter M. Chris-  
stoff Stauffenbuel seliger zum vndern Caplan  
angenommen / ordinirt / vnd eingewiesen worden.

Dieses freundlicher lieber Herr Vetter /  
erzele ich darumb / das man erstlich auff vnser  
lieben Herren Gottes wunderbare regierung se-  
hen soll / vier vnd zwanzig Jar / seindt zwar nicht  
eine



eine so gar lange zeit/ Noch dennoch haben sich/ in  
solcher zeit (nur in vnserer einigen Kirchen zu S.  
Andreas) so vielfaltige vorenderung zugetragen/  
das man sich darüber verwundern mus / Dann  
es heist / Mirabilis est Dominus in operibus suis.  
Gott ist wunderbar in allen seinen wercken/wenn  
die Menschen meinen / es soll so vnd so hinaus  
gehen / dieser oder jener soll grosse ding ausrich-  
ten / so wendets vnser lieber Herr Gott gar vmb/  
ehe man sichs vorsihet/ vnd machts wie er es ha-  
ben wil.

Man sihet auch aus dieser erzehlung / das  
jung vnd starck / in der Leute gunst vnd gutem an-  
sehen sein / nicht hilffet / lange zu leben / vnd viel  
auszurichten/wie auch vnser schwachheit/vnser  
Herren Gottes fürsatz vnd willen nicht endern  
kan / Es seind viel feiner junger starcker / ansehn-  
licher/wolgehaltener/gelerter Menner / vnter de-  
nen gewesen / die in iht benenter zeit von himmen  
abgeforder t sein / Dogegen ich schwach vnd alt/  
nach Gottes willen bis dohero habe bleiben müs-  
sen/dessen doch weder ich selbst / noch andere Leute  
te sich hetten vorsehen können / Dann für etlich  
vnd dreissig Jaren / da ich noch an den Schul-  
diensten gewesen / bin ich etliche Jar nach einan-  
der stets so krank vnd schwach gewesen / das ich  
selbst anders nicht gemeinet habe / dann das es  
nicht

nicht lange mit mir weren könnte / So war es auch  
an deme / das mir die fürnemsten Medici / Doctor  
Matthias Katzenberger / des Churfürsten zu  
Sachsen / Herzog Johan Fridrichen (hochlöbli-  
cher gedechtnus) Leibartz / Doctor Simon Wil-  
de / vnd Doctor Johan Pontanus / auch beide  
Fürstliche Sachsische Hoffartzte (derer rath ich  
gebrauchte) alle gleich mein Leben also absagten /  
das sie anzeigten / Es könnte nicht wol möglich  
sein / das ich noch ein Jar vberlebete / Nun hat es  
dennoch vnser Herr Gott also vmbgeart / das  
dieselben fürtrefflichen Leute alle dohin sein / ich  
aber lebe noch / so lange der liebe Gott wil. Dar-  
umb bleibt es wol / wie im Propheten stehet / Je-  
rem. 10. Ich weis H E R R / das des Menschen  
thun (vnd sein gankes leben) stehet nicht in seiner  
gewalt / vnd stehet in niemandes macht / wie er  
wandele / oder seinen gang richte / Sondern (wie  
Job am 14. sagt) Der mensch hat seine bestimpte  
zeit / die zahl seiner Monden stehet bey Gott / der  
hat im ein zihl gesetzt / das wird er nicht vberge-  
hen. Vnd David spricht Psalm. 31. das seine zeit  
in Gottes henden stehet / denn er ist die lenge vn-  
sers lebens.

sa. 52. Grea  
finem

Drumb sol niemandt an den schwachen ver-  
zagen / Gott kan sie auffrichten vnd stercken / nie-  
mandt sol auff eines andern Todt hoffen / wie  
schwach

schwach er auch ist / denn er weis nicht wle nahe  
sein eigen ende sey. Niemandt sol sich auff seine  
jugent/stercke / oder an die menschliche förderun-  
gen vorlassen / Es kan sich sehr balde alles wend-  
den/dohin fallen/vnd wie ein rauch vnd nebel vor-  
gehen.

Weil es denn mit ewrem lieben Bruder auch  
also ergangen / das er von vnserm lieben Herren  
Gott in seinem besten alter vñ jungen Jahren / mir  
von meiner seiten hinweg gerückt worden / hat mir  
zwar solchs herzlich zu gemüt gegangen / Ich hab  
es aber dem heimstellen müssen / des wille der be-  
ste ist. Weil jr auch die Predigt / welche ich durch  
Gottes gnade / bey seinem Begrebnus gethan /  
von mir begeret habt / So habe ich von derselben  
die kurze disposition / so gut sie der liebe Gott nach  
meiner einfalt gegeben hat / auffgezeichnet / welche  
ich euch hiemit vberschicke / Wenn ich auch euch vñ  
den ewren etwas mehr zu gefallen vnd zu ehren  
thun könnte / so solt jr mich / als ewren Veuattern  
vnd guten freundt willig erfinden / Vnd thue hir-  
mit euch / vnd vns allen in den gnedigen schutz des  
Allmechtigen befehlen / Datum Eisleben den 28.  
Octobris / am tage Simonis vnd Jude / Anno  
1584.

Hieronimus Mencilus  
Superintendens.

B Der

Der Spruch Hebr. 13.

Gedencket an ewre Lerer etc.

Kürzlich aufgeleget.

**W**eil wir heute auff den tag Jacobi  
bey der Christlichen begrebnus vnser lieben  
herrn collegæ M. Christoff Stauffenbuechs  
zusammen kommen / so hetten wir wol ursache /  
desselben tages Euangelium zu ercleren vnd  
auszulegen / Weil es aber auff den morgenden Sonntag / che  
wir von diesem zufall etwas gewust / verschoben ist / wollen wir  
dasselbige dahin sparen / vnd jet etliche wort aus der Epistel  
an die Hebreer / welche vns zur Lere vnd Vormanunge die-  
nen werden / fürnehmen / vnd nach vnserm einfalt ercleren / Das  
aber solchs mit nutz vnd frucht geschehe / zur chre des Göttli-  
chen Namens / zu sterckung vnser schwachen glaubens / vnd  
zu bess rang des sündelichen lebens / wollen wir vnsern lieben  
himlischen Vater / vmb die hülffe des heiligen Geistes / in  
dem Namen des Herrn Jesu Christi anruffen / vnd mit ein-  
ander das heilige Vater vnser beien.

Hebr. 13.

Gedencket an ewre Lerer / die euch das wort  
GOTTES gesagt haben / welcher ende schawet  
an / vnd folget irem glauben nach.

Gehorchet ewren Lerern / vnd folget inen /  
denn sie wachen vber ewre Seelen / als die da  
rechenschaft dafür geben sollen / auff das sie das  
mit freuden thun / vnd nicht mit seufftzen / Denn  
das ist euch nicht gut. Betet für vns.

Gott

Gott aber des Friedes / der von den Todten  
ausgeföhret hat / den grossen Hirten der Schafe/  
durch das blut des ewigen Testaments / vnsern  
HERREN Jesum / der mache euch fertig in al-  
len guten wercken / zu thun seinen willen: vnd  
schaffe in euch / was für im gefellig ist / durch Je-  
sum Christ / welchem sey ehre von ewigkeit zu  
ewigkeit / Amen.

**I**n diesem text / geliebten im Herrn  
Christo / welchen ich aus dem dreyzehenden Ca-  
pitel der Epistel an die Hebrer / nicht wie er auff  
einander folget / genommen / sondern zusammen  
gezogen / ist / die summa / Das der Apostel mit  
allem fleis / alle Christliche psarkinder vnd zuhörere des gött-  
lichen worts lere / vnd vermanet / wie sie sich gegen ire Lerere  
vnd Prediger / beides weil sie noch bey inen sein / vnd ir ampt  
füren / vnd dann auch / wenn sie Gott der Herr zur ruhe von  
inen genommen hat / halten vnd erzeigen sollen / Die gegenwer-  
tigen sollen sie hören / vnd inen nach Gottes worte gehorchen  
vnd folgen / Der abwesenden sollen sie nicht vorgeffen / sondern  
irer also gedenccken / das sie auff ir Christlich Ende vnd ab-  
schied sehen / vnd irem glauben nachfolgen / damit sie auch ler-  
nen / wie sie zum seligen Ende kommen mögen.

Dazu setzet er einen wunsch an stadt eines Gebets /  
das Gott der Herr die frommen zuhörere / vmb des Herrn  
Jesu Christi willen auch regieren vnd fertig machen wolle / zu  
allem guten wercke / das sie thun mögen / was vnserm Herren  
Gott wolgefellig ist / damit Gottes wille in Lerern vnd Zuhö-  
rern geschehe / vnd Er von in beiden geehret vnd gepreiset wer-

B ij de/von

## Theilung dieser predigt.

Nach kürzlich erzelter summa vnd anweisung wohin dieser Text / nach dem heuptpunct / in vnserm heiligen Catechismo gehöre / wollen wir die auslegung desselben / mit Gottes hülffe in nachfolgende drey stücklein zusammen ziehen.

Vnd Erstlich / auff die beschreibung der personen sehen / von welchen hie der Apostel redet / was er inen vor eigenschafften zuschreibet.

Zum Andern / wie sich die Christlichen Zuhörer gegen ihre Prediger vorhalten sollen.

Zum Dritten / von des Apostels gebete oder gutem wunsche / welchem auch andere Lerer billich folgen sollen / für ihre psarkinder also zu beten.

Hierzu verleihe Gott der Vater vmb Jesu Christi willen seinen heiligen Geist / das Lerer vnd Zuhörer / was nützlich vnd Gott wolgefellig sey lernen vnd lernen mögen / Amen.

### Vom Ersten.

**D**er Apostel gedencet alhie der Lerer / die im heiligen Predigampte sein / vnd mit leren vnd predigen vmbgehen / denen gibt er etliche eigenschafften zu / vnter welchen die erste vnd fürnembste ist / Das sie ihren Zuhörern das wort sagen.

Solch wort ist gefasset in die schriftten Moses / der heiligen Propheten / Euangelisten / vnd Aposteln / des Herren Jesu Christi / vnd wird nach gewöhnlichem brauche in zwey stücke getheilt / als in die lere des Göttlichen Gesetzes / vnd die predigt des heiligen Euangelij.

Zum Gesetze gehören die heiligen zehen Gebot / vnd alle andere ordnungen / vnd gebot Gottes / welche Gott durch Mozen seinem Volcke geben lies / das sie nach demselben ihre tegliche Opffer verrichten / vnd imc dienen mussten.

2. iii

Zum

Zum Euangelio gehöret die lere von dem vordienſt vnd  
wolthaten vnſers Herren Jeſu Chriſti/ vnd iſt die fröliche bot-  
ſchaft vnd vorkündigung der vorgebung der Sünden/ aus  
gnaden/ vmb Chriſtus willen/ zu welcher die lere von den hoch-  
würdigen Sacramenten gehöret.

Dieſe Leren ſollen der trewen vnd rechtſchaffenen Pre-  
diger ſtettes thema ſein / das ſie dieſelben richtig führen / dauon  
weder zur rechten noch zur lincken weichen / wie inen dann  
Chriſtus ſelbs im neuen Teſtament mit ſeinem Exempel für-  
gegangen iſt / Geſez vnd Euangelium geprediget / Vnd Luc.  
24. in ſeinem beſtallbrieffe / ſolche predigt ſeinen Apoſteln zu  
führen befohlen hat/ da er ſpricht: Also iſts geſchrieben/ vnd al-  
ſo muſte Chriſtus leiden/ vnd auſferſtehen/ von den toden/ am  
dritten tage/ vnd predigen laſſen in ſeinem Namen Buſſe vnd  
vergebung der Sünde / vnter allen Völkern / vnd anheben  
zu Jeruſalem. Vnd Matth. 28. ſpricht er / Mir iſt gegeben  
alle gewalt im Himmel vnd auff Erden. Darumb gehe  
hin vnd lere alle Völker/ vnd teuffet ſie im Namen des Vas-  
ters/ vnd des Sons / vnd des heiligen Geiſtes / vnd lere ſie  
halten alles was Ich euch befohlen habe. Luc. 16. weiſet er auff  
Moifen vnd die Propheten / da er zu dem Reichen ſpricht:  
Sie haben Moifen vnd die Propheten / laß ſie  
dieſelben hören. Denn alle Menſchen ſollen vnd müſſen  
an das Göttliche wort/ als an ſeinen heiligen Munde verbun-  
den ſein.

Dieſes wort aber ſollen die trewen vnd fürſichtigen Pre-  
diger/ nach der vermanung S. Pauli/ 2. Tim: oh. 2. recht thei-  
len / das ſie mit der Predigt vnd Geſez gegen die vnbusfertiz-  
gen ernſtlich verfahren / die Sünde offenbaren vnd ſtraffen/  
die Leute zur waren Buſſe vnd bekerung von Sünden ver-  
manen / Mit dem Euangelio aber ſollen ſie die Busfertige  
vnd

vnd trostlose Herzen auffrichten / vnd trösten / wie denn der Herr  
re Christus auch solche Herzen zu sich ruffet / Matth. 23. Kommet  
her zu mir / alle die jr mühselig vnd beladen seid / Ich wil euch  
erquicken. Mühselige Herzen / das ist e eengste gewissen mühs  
sens sein / die ire Sünde sülen / vnd mit Petro / Maria Maga  
dalena / vnd andern herzlich beweinen / welche der Herr Chri  
stus zu sich haben wil / denen saget er erquickung zu / nemlich /  
erstlich im worte / do er spricht / Des menschen Son ist komen /  
zu suchen vnd selig zu machen / das verloren war / Denn also  
hat Gott die Welt geliebet / das er seinen eingebornen Son  
gegeben hat / Auff das alle die an in glauben / nicht verloren  
werden / sondern das ewige leben haben. Darauff setzet er die  
andere erquickung / durch sein heiliges Nachtmal / darinnen er  
sie mit seinem Leib vnd Blute speiset vnd trencket / vnd damit  
die Herzen vorsichert / das sie in Gottes gnaden sein / vnd ver  
gebung der Sünden haben.

Das erste ist die eine vnd fürnemeste eigenschafft eines  
trewen rech. schaffenen Predigers / das er Gottes wort in rech  
tem br. auch vnd in fürgeschriebener ordnung für / treibe / vnd  
vleißig an demselben halte vnd bleibe.

Das Andere ist / das die Prediger vber irer Zuhörer  
Seelen wachen / damit dieselben nicht vorseumet noch vors  
füret werden / dauon heissen sie Seelsorger / Seelhirten / trewe  
We. hter im haus des HERRN.

Diese eigenschafft bringet mit / das sich die Prediger /  
wider irer Zuhörer geistliche feinde / mit allem ernst vnd trewen  
setzen vnd legen / das seind die falschen Lerer vnd Keker / des  
Teuffels hoffgesinde / welcher wie ein brüllender Lowe umbher  
gehet / vnd suchet wen er versüren vnd betriegen möge. Nie  
mus warlich ein trewer Lerer fürsichtig sein / vnd gute achtung  
geben / das jme vnter seine Scheslein nicht betrigliche vnd  
schädliche Lehren eingefüret werden. Sindet er etwas das wi  
der



der Gottes wort / vnd den lieben Catechismum eingefüree  
wird/wenn es schon von hohen Leuten vnd mit grossem schein  
geschihet/ So ist zeit ruffens. wehrens vnd warnens. Drum  
foddert S. Paulus von einem rechtschaffenen Bischoff zweis  
erley/ 1. Timoth. 1. Eins/das er halte ob dem worte / das ge  
wis ist/vnd lehren kan/ Das andere / das er mechtig sey zu er  
manen/durch die heilsame Lere / vnd zu straffen die widerspres  
cher.

Nach dieser eigenschafft mus auch ein Lerer auff das  
leben seiner zuhörere sehen/ wo sie etwa in die irre komen / wider  
Gottes wort in öffentlichen oder wissentlichen Sünden leben/  
das er sie anschreie/warne/vnd zu rück ruffe/ damit sie nicht in  
iren Sünden bleiben vnd verderben/denn es heist/Es trette ab  
von vngerechtigkeith / wer den Namen Christi nennet / 2. Ti  
moth. 2.

Worumb sol nun dieses geschehen / vnd was sol einen  
jeden Prediger treiben/ das er weder zu vnrechter lere / noch zu  
bösem ergerlichem leben seiner psarkinder stille schweigen kan?

Hierauff ist die Antwort: Erstlich Gottes beschlich/  
welcher haben wil/ das man alle Sünden / der ersten vnd an  
dern Taffel/mit allem ernste/ vnd ohne ansehen der personen/  
straffen soll / denn im Propheten befehlet Gott der HERR/  
man soll straffen / wenns schon die Leute nicht hören noch sol  
gen wollen / Ezech: 2. Du solt jnen mein wort sagen / Sie ge  
horchen oder lassens. Esai: 58. Ruffe getrost / schon nicht/  
erhebe deine stimme / wie eine Posaune / vnd verkündige meis  
nem Volck jr vbertretten / vnd dem hause Jacob seine Sün  
de. S. Paulus 2. Timoth. 4. Predige das wort/ halt an/ Es  
sey zu rechter zeit oder zur vnzeit/ Straffe/ Drawe/ Ermane/  
mit aller gedult vnd lere etc. Dieses seind ernste befehle / nach  
welchem sich die Lerer richten müssen / wo sie anderst trewe er  
sunden werden wollen.

Zum

Zum Andern / soll die Prediger zu trewer vorrichtung/  
sonderlich des Straffampts treiben / die ernste Rechen schafft/  
welche sie davon werden geben müssen / vnd solchs nicht einem  
schlechten vnd geringen Herren / Sondern dem aller höchsten  
Richter / im Himmel vnd auff Erden. Denn also spricht Gott  
der HERR / Ezech. 33. Du menschen kind / Ich habe dich zu  
einem Wechter gesetzt / vber das Haus Israel / wenn du etwas  
aus meinem Munde hörest / das du sie von meiner wegen war-  
nen solt / Wenn ich nu zu dem gottlosen sage / Du gottloser  
mußt des todes sterben / vnd du sagest ime solchs nicht / das sich  
der gottlose warnen lasse / für seinem wesen / So wird wol der  
gottlose vmb seines gottlosen wesens willen sterben / Aber  
sein Blut will ich von deiner hand fordern. Davon  
sagt auch allhie der Apostel / Sie wachen vber ewre see-  
len / als die da Rechen schafft dafür geben sollen.

Aus diesem Ersten stück sollen wir lernen vnd behalten/  
Zum Ersten / was für ein hohes vnd schweres Ampt es sey/  
vmb das heilige Predigampt / die weil demselben die höchste  
sorge / vnd aller schwerste Rechnung aufferleget ist / Ire sorge  
ist / für die Seelen der Menschen / welche Jesus Christus mit  
seinem heiligen tewren Blut erworben hat / die sollen sie wei-  
den / vnd leren / allein mit dem reinen Göttlichen worte / wo sie  
darinne seumig oder vntrewe sein / wils Gott ernstlich von  
inen foddern.

Es wird auch in diesem stück gesehen / worauff das heis-  
lige Predigampt gerichtet ist / nicht auff müßiggang / wie welt-  
liche meinen / sondern auff trewe arbeit im worte des HERR-  
N / Wie der Apostel sprichet / das man die / so im worte ar-  
beiten / zwifacher ehren werth halten soll / darzu gehöret vleissig  
studieren vnd ernstlich beten / das Gott gedeien vnd segnen dar-  
zu verleibe. Es heist auch nicht nach weltlicher prache / vnd  
zeitlichem

zeitlichem gut trachten / wie der Papst mit seinem haußern  
thut / sondern nach der leute heil vnd seligkeit / die sollen sie sus-  
ehen / vnd für sich selbst dencken / das sie Gott trewe vnd selig  
werden.

Zu lezt sihet man auch hieraus / das an einem trewen  
Prediger vnd Seelsorger viel gelegen ist / denn durch solche leute  
suchet vnd ruffet vns Gott in sein Reich / vnd schencket vns  
in demselben alle güter vnd sache des ewigen Lebens / was könn-  
ten wir besser begeren ? vnd woran were vns auch mehr geles-  
gen / sintemal das ander alles hinter vns bleiben mus. So viel  
vom ersten stücklein.

### Vom Andern.

Wie sollen sich die Christlichen zuhörere gegen ihre Prediger  
vnd Seelsorger verhalten ? Hierauff ant-  
wortet der Apostel also.

**E**rstlich setze er den vnterscheid der zeit / wie man sich ge-  
gen sie am leben verhalten solle. Darnach wie man sich  
nach irem abschiede erzeigen soll / Bey irem leben sol  
man dreierley thun / Das erste sol sein /

### Das man sie höre.

Denn wie den Lehrern ernstlich befohlen ist / treulich zu-  
leren / also ist auch den Zuhörern gebotten / das sie die Lere hö-  
ren / zur predigt kommen / vnd das heilige Göttliche wort nicht  
verachten / Denn wir sind ( spricht S. Paulus 2. Corinth. 5. )  
Gottes Botschafften / an Christus stadt / denn Gott vermas-  
net durch vns / Vnd Christus sagt Johan. 8. Wer von Gott  
ist / der höret Gottes wort. Luc. xi. Selig sind die Gottes  
wort hören vnd bewaren / Johannis. x. Meine schafe hören  
meine stimme. Johan. 14. Wer mich liebet / der wird mein  
wort halten / Darauff ist das dritte Gebott gesetzt / das spricht /  
Du solt den Sabbath heiligen / das ist / du solt Gott fürchten  
vnd

vnd lieben / vnd die predige des Göttlichen worts nicht betrach-  
ten / noch verfeumen / Sondern gerne hören vnd lernen / vnd  
auch das leben darnach richten / vnd daraus bessern.

Das Andere soll sein / das man inen auch gehorche vnd  
folge / wie der Apostel spricht / Gehorchet ewren Lerern  
vnd folget inen.

Dieses wird von der besserung des lebens vnd dem ge-  
horsam gegen Gottes wort gesagt / wie der Apostel an einem  
andern ortte sagt / Wir sollen nicht blos hörere / sondern auch  
theter des worts sein / Also wil er hie / das wir deme / was vns in  
worte fürgepredigt wird / sollen folgen / das wir dem worte fest-  
iglich glauben / weil es Gottes wort / vnd die ewige bleibende  
warheit ist / Vnd sollen vns mit höchstem ernste bemühen / das  
wir also thun vnd leben mögen / wie vns das wort heisset vnd  
fürsaget / Denn was hilfft es / wenn man vns gutes fürpre-  
digt / vnd niemand ist der es achtet vnd annimmet / Solchs ist  
eine schwere grewliche Sünde / von welcher Gott also sagt /  
Jerem: 2. Es ist deiner bosheit schulde / das du so gesteupe  
wirst / vnd deines ungehorsams / das du so gestrafft wirst / Also  
mustu inne werden / vnd erfahren / was für jammer vnd herzkleid  
bringet / den HERRN deinen Gott vorlassen / vnd in nicht  
fürchten etc. Es heist vnsern HERRN Gott vorlassen / vnd  
in nicht fürchten / wenn man seinem worte / das er vns fürpre-  
digen lesset / nicht gehorsam ist / das bringet herzkleid / zeitliche  
vnd ewige straffen.

Wie soll man aber den Predigern gehorchen vnd fol-  
gen? Also spricht der Apostel / das die Lerer darüber friede  
haben / das sie frölich sein / vnd iren lieben Gott dafür dan-  
cken / das ire predige nus schaffet / vnd sich ire zuhörer ders-  
selben wol bessern. Hie von haben wir S. Pauli Exempel /  
welcher an die Philipper also schreibet / Ich dancke meinem

E ij Gott /

Gott / so offte ich ewer gedencke / (welchs ich allezeit thue in alle  
meinem gebet / für euch alle / vnd thue das Gebet mit freuden)  
vber ewer gemeinschafft am Euangelio / vom ersten tage an  
bisher / vnd bin desselben in guter zuvorsicht / das/der in euch  
angefangen hat das gute werck / der wirds auch volführen / bis  
an den tag Jesu Christi. Item Coloss. 1. Wir dancken Gott  
dem vater vnser Herrn Jesu Christi / vnd beten allezeit für  
euch/nach dem wir gehört haben / von ewrem glauben an Jesu  
sum Christ. Solche freude der Diener Gottes vber ire zuhörs  
rer/ist jnen eine grosse ehre / vnd gefellet vnserm lieben Herren  
Gott vber alle masse/Wie es einem grossen herren wolgefellet/  
wenn man seine Legaten ehret vnd liebet.

Bei diesem wils der Apostel nicht bleiben lassen / son  
dern er setzet die antithesis auch darzu / vnd spricht/ **Auff**  
**das** sie (ir ampt) nicht mit scuffzen thun / denn  
**das** ist euch nicht gut. Als wolt er sagen/

Wenn ewre Lerer vber euch frölich sein / vnd Gott dan  
cken / ja auch für euch beten / das euch Gott im glauben sters  
cken / im leben mit seinem Geist regieren wolle / das jr in der  
gottseligkeit fortfaret vnd zunehmet / so kömpt euch solch ges  
bet auch zu gute/ Denn vnser lieber Herr Gott verachtet solch  
gebet nicht/ er lesst es ohne frucht nicht abgehen / Wenn aber  
das widerspiel geschieht / das die zuhörere mutwillig vnd unges  
horsam sein / vnd wollen sich den Geist Gottes durchs wort/  
weder wissen noch straffen lassen / das es gehet / wie Gott der  
HERR Gen. 6. klaget / Die Menschen wollen sich meinen  
Geist nicht mehr straffen lassen / denn sie sind fleisch etc. So  
ists nicht gut/vnd gerech jnen nicht wol/Sondern es gewinnet  
den ausgang / wie es mit der ersten Welt / vnd mit denen zu  
Sodom vnd Gomorrha gieng. Dafür warnet hie der Apostel  
alle menschen/ die sich warnen lassen wollen.

Das

Das Dritte sagt der Apostel / sol sein / das die Christliche  
zuhörer für ire Prediger vleissig bitten / wie die wort lauten /

### Betet für vns.

S. Jacob sprichet Cap. 5. Betet für einander / das ir  
gesund werdet / die Prediger sollen für ire pfarkinder bitten /  
wie wir newlich gehöret haben / das S. Paulus gethan hat /  
vnd der Apostel am ende dieses textes auch thut / Also sollen  
widerumb die zuhörere für ire prediger bitten / denn solchs kompt  
nen mit zu gute. Vmb solch Gebet sucht S. Paulus an /  
Ephes. 6. Betet stets in allem anliegen / mit bitten vnd flehen /  
im Geist / vnd wachet dazu mit allem anhalten vnd flehen / für  
alle heiligen vnd für mich / auff das mir gegeben werde das  
wort / mit freidigem auffstun meines mundes / das ich möge  
kundt machen das geheimnis des Euangelij / welches Bote ich  
bin / in der ketten / auff das ich darinnen freudig handeln mös  
ge / vnd reden / wie sichs gebüret.

Dreierley sagt der Apostel / sollen die zuhörere von vns  
sern lieben Herrn Gott iren Lerern erbitten / Eins / das in vns  
ser lieber HERR Gott sein wort geben wolle / das ist / das sie  
in dem reinen heilsamen worte Gottes rechten verstandt ha  
ben / vnd in gesunder heilsamer Lere bleiben. Das andere / das  
sie dasselbe richtig vnd freudig leren / vnd one surcht vnd schew  
die warheit ausbreiten / vnd allem irthumb vnd sündlichem les  
ben mit vleis einreden vnd widersprechen. Das dritte / das  
solche predigten durchdringen / vnd durch Gottes Geist vnd  
seggen nutz schaffen.

Wenn nu Christliche zuhörere solches bey vnsern lieben  
Herren Gott suchen vnd erhalten / so ist der nutz ir desto gröf  
ser / das sie bey gesunder Lere / auff rechter bahn / in Gottseli  
gem leben erhalten / vnd recht vnd wol zum Himmel gewisset  
werden.

Diese Stücklein sollen fromme zuhörer in lassen befohlen  
sein/das sie sich in denselben gegen ire Seelsorger rechtschaffen  
verhalten/weil vnd so lange sie bey ihnen/vnd am leben sein.

Wie sol man sich aber gegen sie halten/wenn sie vora  
schieden sein? Wenn sie vnser lieber Herr Gott aus diesem  
leben abgefördert/vnd zu ruhe bracht hat? kan man ihnen denn  
da auch mit etwas dienen vnd danckbar sein? Antwort ist/

Ja erawen/Denn das Sprach in gemeine saget/ Bes  
weise deine wolthat auch an den todten/ Das soll man auff die  
Prediger auch ziehen/das man sie ehrlich verhalten/ Christlich  
zur Erde bestatten/vnd zum Begrebnus beileiten vnd bringen  
soll/Aber vber diese gemeine wolthat/saget hie der Apostel von  
dreierley. Erslich spricht er/

### Gedencket an ewre Lerer.

Man soll derer die vns gelert haben/nicht vergessen/  
sondern an sie gedencken/was sie vns zu gut gethan haben/  
haben sie vns mit zeitlichem gute nicht können helfen vnd dies  
nen/wie S. Petrus zu dem Lamen sagt/Act. 3. Silber vnd  
gold habe ich nicht/was ich aber habe/das gebe ich dir etc. so  
haben sie vns doch mit anderm gedienet/das vns nützer gewes  
sen ist/denn silber vnd gold/vnd alles zeitliche gut/Denn mit  
dem reinen heilsamen wort Gottes/welchs (wie Jeremias  
sagt) alleine vnser hertzen freude vnd trost/vnd wie Paulus  
spricht/eine krafft Gottes ist/die vns selig machet/haben sie  
vns vnterrichtet vnd gelert/Die heilige Absolution vnd verges  
bung aller vnser Sünden/welche vns Jesus Christus mit seis  
nem heiligen Leiden vnd sterben verdienet vnd erworben hat/  
haben sie vns/so offte wir dasselbe bedorfft/mitgeteilet/Das  
hochwürdige Sacrament/die rechte Seelen speise/zu vorstehes  
rung vnser heils/vnd sterckung des glaubens/haben sie vns  
gereicht/ In vnsern creuzen/ trübjaln vnd schwachheiten has  
ten

ben sie vns bejucht / für vns gebetet vnd treulich gewachtet. Dies  
ses alles sind solche wolthaten vnd dienste / der wir nicht vers  
gessen sollen / Vnd da wir den lieben verstorbenen Seelsorgern  
nach irem seligen abschiede anders nichts thun können / so solz  
ten wir derselben ire weib vnd kinder genießen lassen / das wir  
denselben auch gutes erzeigen / sie in irem Elende trösten / vnd  
inen helfen / wo wir können vnd mögen / Solche danckbarkeit  
gefelle vnsern lieben Herren Gott herzlich wol / die er allhie  
wider mit allem segen vergelten / vnd dort in ewiger siende für  
allen außewelten Gottes heiligen höchlich räumen vnd preis  
sen wird / Matth. x. vnd xxv.

Das Ander / das man nach der Prediger tode thun soll /  
ist / das man auff ir ende sehe /

### Welcher ende schawet an.

Sehet auff iren abscheide / wie sie ir ende beschlossen /  
Bleiben sie bey der reinen heilsamen Lere / die sie euch haben  
fürgetragen / ja wo sie auch vmb derselben willen leiden / vnd  
dieselbe mit irem blut bezeugen / wie die lieben Propheten / Apos  
stel / vnd viel tausent heilige Märtyrer gethan haben / so könne  
ir euch desto fester an dieselbe halten / auch bey derselben bestens  
diz bleiben / Darauff gehet das dritte /

### Vnd folget irem glauben nach.

An den Herren / an den sie sich mit irem glauben gehal  
ten haben / gleubet auch / vnd wie Gott sie auffgenommen hat  
nach seinem heiligen worte / vnd hat sie in Christo Jesu seinem  
Sohn / welchen sie gepredigt haben / selig gemacht / Also wird  
er auch alle selig machen / die sich in gleichem glauben vnd  
herzlichem vertrauen an Jesum Christum finden lassen.

Das ist auch kürzlich das ander stücklein / darinne wir  
geleret worden sein / wie wir vns gegen trewe Lere vnd Predi  
ger beides an irem leben / vnd nach irem tode / vorhalten sollen /  
vnd



vnd ist ein erweh vormanung für alle fromme Christen/das sie  
inen solche Lere befohlen sein lassen / vnd sich darnach richten  
sollen/ denn damit thun sie Gott einen wolgefallen / vnd bring  
gen vber sich seinen segen / das er inen hie vnd dort alles gutes  
widerfahren lesset / Wie wideruub gewislich denen/so das wi  
derspiel thun/die prediger bey irem leben verachten / nach irem  
abschiede vnehren/ vnd die iren betrüben / die ernstest drawun  
gen/mit vnnachlessiger straffe nicht werden seilen noch aussen  
bleiben / Es heist ja / Wer einen aus diesen geringsten verach  
tet oder ergert/ der hats mir gethan / vnd wer die gesalbten des  
H E R R E N vngübürlich angreiffet/der hat Gott in seinen  
augapffel gegriffen. So viel auch in der fürze von dem an  
dern stücklein.

### Vom Dritten.

**D**er Apostel hat das Gebete von seinen Zuhörern für  
sich begeret/ Du bittet er widerumb für seine Zuhörer  
vnd pfarkinder / Es kan aber das Gebetlein in zwey  
stück geteilt werden.

Im Ersten / ist die beschreibung des H E R R E N gese  
het/ zu welchem der Apostel betet.

Im Andern / wird erzelet was er bitte / vnd warumb  
Gott sein Gebet annemen vnd erfüllen werde. Von dem  
Ersten stücke sind des Apostels wort diese/

Gott aber des Friedes / der von den Todten  
ausgefuret hat den grossen Hirten der Schafe/  
durch das blut des ewigen Testaments / vnsern  
H E R R E N Jesum Christum.

Erstlich nennet er den H E R R E N/zu welchem er betet/  
Einen Gott des Friedens / dieser ist Gott der Vater  
vnsern Herren Jesu Christi/ bey deme haben wir Friede/ vmb  
des Sons willen/ der sein Blut für vnser sünde vergossen/ vnd  
damit

damit den Vater versöhnet / vnd vns einen ewigen Frieden erworben hat / das wir / wie S. Paulus zum Römern am 5. spricht / friede haben mit Gott / durch vnsern Herren Jesum Christ / durch welchen wir auch einen zugang haben im glauben / etc.

Zum andern sagt er von jme / das er von den Todten ausgefüret habe / vnsern Herrn Jesum Christum / dieses sagt S. Petrus auch / Act. 2. Diesen Jesum hat Gott aufferwecket / vnd auffgelöset die schmerzen des Todes / nach dem es vnmöglich war / das er solte von jnen gehalten werden. Item bald hernach / Diesen Jesum hat Gott aufferwecket / des sind wir alle zeugen.

Zum dritten nennet er Jesum den grossen Hirten der Schaffe / das ist / den Hirten / welcher der Oberste ist / vnd das die Schaffe auff zweyerley recht sein eigen sein / Ersilich dies weil er mit dem Vater Allmechtiger Gott ist / vnd alles / vnd also auch alle Menschen in seiner Allmechtigen hand hat. Johan. 10. Zum andern / weil er die Schaffe erkauft hat / nicht mit Golde oder Silber / sondern durch sein eigen Blut / wie abermal Johan. 10. stehet / ich lasse mein leben für die Schaffe / vnd S. Paul. Acto. 20. Weidet die gemeine Gottes welche er durch sein eigen Blut erworben hat.

Zum vierden sagt er von dem ewigen Testament / welches durch das Blut vnsern Herren Jesu Christi auffgerichtet worden ist / vnd schleust in solche wort / die kressrige ursache / vmb welcher willen Gott das Gebet erhöre / vnd gewis gnedig sey / Denn auff Christo stehet es alles / darzu hat er sein Blut vergossen / das er vns gnade erwörbe / vnd vnser gebete in seinem Namen erhöret werden / Johan. 16. Es ist aber ein ewiges Testament / das zu allen zeiten gildet vnd kressrig ist. So offte man sich zu demselbigen in rewigem hertzen vnd starckem vertrauen kere vnd wendet / so lest Gott der Vater den Bunde

D

gelten /

gelten / den er mit vns Menschen auffgerichtet / das wir vmb Christi seines Sons willen zu gnaden angenommen werden.

Hiemit leret vns der Apostel / zu wem wir das Gebet richten sollen / wenn es nutz schaffen / erhöret werden / vnd gelten soll / nicht zu verstorbenen Heiligen / noch zu einiger Creatur / sondern allein zu dem rechten waren Gott / welcher auch im 50 Psalm spricht / Ruffe mich an in der zeit der noth / Vnd Deut. 6. Matth. 4. Du solt anbeten Gott deinen HERRN / vnd jm allein dienen.

Zum andern lernen wir / wer derselbige ware rechte Gott ist / der allein die Gebet erhöret / vnd erhören kan? es sind nicht die heidnischen Götzen / noch die erdichteten Götter der Jüden vnd Türcken / Sondern alleine der Gott / der do ist ein Vater vnsers Herren Jesu Christi / der in seinem Sone ein Gott des Friedes ist / der in dem Blute seines Sons / ein ewig Testament auffgerichtet hat / vnd zu gnaden annimpt / die an seinem Son glauben / Johan. 1.

Zum dritten werden wir auch geletet / worauff vnser Gebet / wenns erhöret werden soll / gegründet sein mus / Auff das verdienst des grossen Hirtens Jesu Christi / in demerallein sind alle vnser Gebet erhöret / Ja vnd Amen etc.

Von dem andern stücklein des Gebets / spricht der Apostel also /

Der mache euch fertig in allen guten werken / zu thun seinen willen / vnd schaffe in euch / was für jm gefellig ist / durch Jesum Christum / welchem sey ehre / von ewigkeit zu ewigkeit / Amen.

In diesen Worten wird des Apostels Gebet beschrieben / das er anzeigen / warumb er bitte / oder was er seinen pfarkindern gerne erhalten vnd erlangen wolte / vnd fasset dieser text drey stücklein zusammen.

Das

Das erste stehet in den Worten / Der **HERRE**  
mache euch fertig in allen guten Wercken / zu sei-  
nem Willen / Das ist / Er bittet / das Gott der **HERRE**  
seine liebe pfarkinder mit dem heiligen Geiſt erleuchten vnd re-  
gieren wolle / das in ihnen durch die predigt des göttlichen wort-  
tes / der glaube angezündet werde / aus welchem sie Gott nach  
seinem Willen dienen / mit rechtschaffenem gehorsam gegen sei-  
ne Gebot / Denn wenn gute werck geschehen sollen / die Gott  
wolgefallen / so mus der glaube an vnsern Herrn Jesum Christ  
zuuor da sein / Der glaube aber ist nicht ein werck vnseres fleis-  
ches vnd blutes / sondern Gottes werck / das er in vns schafft  
vnd wircket. Johan. 6. vnd Matth. 16. Fleisch vnd blut hat dir  
solchs nicht offenbaret / sondern mein Vater im Himmel etc.  
Darumb bittet er für allen dingen / das Gott den glauben ge-  
ben wolle / der seiner gnaden werck ist / aus welchem / wie gesagt /  
die rechten vñ Gott wolgefälligen werck herfließen / Das wort /  
(Fertig machen) begreiffet den willigen gehorsam / welchen  
der 110. Psalm nennet spontaneam obedientiam. Dein  
Volk wird dir willig opffern im heiligen schmuck / Dieser  
schmuck ist rechtschaffener glaube / der bringet willigen gehors-  
sam / zu thun seinen Willen.

Nicht soll man Gott dienen nach Menschen Willen vnd  
sagungen / Denn Christus spricht Matth. xv. Vergeblich die-  
nen sie mir / dieweil sie leren solche lere / die nichts denn Men-  
schen gebot sind / Sondern vnser Gottesdienst soll sein nach  
Gottes Willen / Wie wir aber nach Gottes Willen thun vnd  
leben sollen / hat er vns in seinen zehen Geboten zu erkennen ge-  
geben / Also wird Zacharias vnd seine Elisabeth von S. Luca  
gelobet / das sie beide für Gott from gewesen / vnd in allen gebot-  
ten vnd sagungen des **HERREN** gegangen sein / vnthadelich /  
nicht nach menschen geboten / sondern nach des **HERREN**

sagungen / Das heist nach seinem willen thun. Das andere  
in obgesagten Worten ist / Das der Apostel spricht /

Und schaffe in euch / was für im gefellig ist.  
Dieses ist fast einerley mit dem vorigen / allein das ers mit dem  
wörterlein (schaffen) noch besser ercleret / Denn soll etwas gu-  
tes in vns vnd von vns kommen / so mus es Gott schaffen / in  
vns wouet nichts gutes / denn vnsers herzen dichten vnd trachz-  
ten ist immerdar arg vnd böse von jugent auff / Gen. 6. vnd 8.  
So spricht auch Christus Matth. 15. das aus dem mensch-  
lichen herzen nichts denn arges quelle / vnd die greulichsten  
sünden / morder / Ehebruch von herstieffen / Sol deme gewereet  
vnd das herze geendert werden / vnd in vns gutes geschehen / so  
mus es Gott geben vnd schaffen / Darumb bittet David  
im ein vnd funffzigsten Psalm / Schaffe in mir Gott ein  
rein herze / vnd gib mir einen neuen gewissen Geist. Vnd also  
nennet S. Paulus die Christen Gottes werck / geschaffen in  
Christo Jesu zu guten wercken / das sie darinne wandeln sollen /  
Ephes. 2. Damit wird den wercken alle ehr vnd ruhm genoms-  
men / das sie bey Gott die seligkeit nicht verdienen / sondern in  
den gleubigen Christen Gottes gnaden werck sein / damit sie  
ime zu dienen schuldig sein. Zum dritten spricht der Apostel /

Durch Jesum Christum / welchem sey ehre  
von ewigkeit zu ewigkeit / Amen.

Damit wird die vrsach widerholet / worumb oder vmb  
wes willen solchs alles geschihet / wer hats verdienet das wir  
neu geboren / gleubig / vnd Gottes werck werden / geschaffen zu  
guten wercken ? Antwort / Allein vnser HERR Iesus Chris-  
tus / der hats erwerben müssen / vnd erwerben können / Des-  
halben da er Johannis am dritten mit Nicodemo von der Wis-  
dergeburt disputiret / vnd in leret / wie man in den Himmel  
kommen / vnd selig werden möge / hanget er mit an. Wie Moises  
Ies

ses in der wüsten eine schlange erhöhet hat / also mus des menschen Son erhöhet werden / Auff das alle / die an in glauben / nicht verloren werden / sondern das ewige leben haben. Als wolt er sagen / Jch vnd niemands anders verdienet vnd erwirbet die gnade / das jr widergeborn / vnd Gottes kinder werdet / heilig lebet vnd selig werdet. Drum sprichet der Apostel hie / Es geschehe durch Jesum Christum vnsern Herrn / deme sol man dafür danken / den sol man loben von ewigkeit zu ewigkeit / Amen / das ist Auch erklerung des dritten stückleins / des Gebets vnd guten wunsches des Apostels.

Danon mu alle Christliche trewe Prediger / die Lere vnd vermanung nemen sollen / das sie sich nach dem exempel des Apostels verhalten / das sie nicht alleine trew / vnd vleissig sein im leren vnd Predigen / sondern auch anhalten im beten / für sich vnd jre liebe psarkinder.

Sie sollen auch hie lernen / was sie jren psarkindern wünschen / vnd von vnserm lieben **HERRN** Gott erbitten sollen / Nämlich / das Gott in jnen lust vnd liebe zu seinem heiligen worte / vnd rechtem beständigen glauben an den Herrn Jesum Christum anzünden / geben / stercken vnd erhalten wolle / das er sie in Gottseligem leben / nach seinen geboten / vnd zu seinem gefallen führen vnd leiten / vnd endlich warhafftig / vmb des Herrn Jesu Christi willen / wolle selig machen / In diesem gebete sollen sie nicht nachlassen / sondern treulich anhalten / so wird Gott dasselbe nicht vmb sonst geschehen / vnd vergebens sein lassen.

Also haben ewre liebe / bey dem fürgenomenen texte / die drey stücklein gehört / zum Ersten die beschreibung der trewen Prediger vnd seelsorger / das jr ampt ist vleissig lehren / für jre psarkinder sorgen / vnd vber jren seelen wachen / damit sie Gott dafür rechenschafft geben können. Zum andern / von den Christlichen psarkindern / welche jrer trewen Seelsorger lere

D iij

hören

Hören vnd lernen/auch gehorsamlich folgen sollen/Vnd sollen  
irer auch nach irem tode nicht gar vergessen / sondern ire trewe  
dienste/so sie inen geleistet haben/erkennen/derselben ire hinder  
lassene Witwen vnd waisen in allem guten vnd freundschaftte  
geniessen lassen. Darauff ist das Dritte gefolget / von dem  
gebete/vnd gutem wunsche des Apostels / den er seinen trewen  
psarkindern ehue/zu gutem exempel/ das auch noch alle Seel-  
sorger / für ire Psarkinder vleissig bitten / vnd allen trewen  
vleis anwenden sollen/das sie neben inen selig werden mögen/  
Das helffe vns allen Gott der Vater / vmb vnsers HERN  
Jesu Christi willen/durch den heiligen Geist/warer Gott / ges-  
lobet von ewigkeit zu ewigkeit/Amen.

**W**Als den Herrn M. Christoff Stauffenbuel anlans  
get/hey welchs Begrebnus wir ist allhie zusammen  
kommen sind/wisset jr alle seinen zustand. Er ist an  
no 1552. den 3. Septembris im Thal Mansfeldt geborn/  
vnd elter nicht worden denn zwen vnd dreissig jar / In seiner  
kindheit ist er fleissig zur schulen gehalten worden/ Er hat auch  
balde wol vnd fleissig studiret / Vnd als er das achzehende jar  
seines alters erreicht hat/ st er anno 1570. gen Strassburg ges-  
schickt worden / vnd ist daselbs vier jar gewesen / vnd hat sehr  
fleissig studiret / vnd sonderlich des ortes die Hebraische sprache  
wol gefasset. Anno 1574. ist er gen Wittenberg kommen/vnd  
hat das folgende 1575. jar / im Iulio in Magistrum promos-  
uirt. Von dannen ist er in unsere Schule beruffen / vnd ange-  
nommen/ vnd in demselben dinst ehlich worden. Anno 1576. ist  
er aus der Schulen genommen/vnd zu einem Caplan zu S. An-  
dres kirchen gesetzt/vnd den 24. Octobris ordinirt vnd anges-  
wiesen worden/das er also unserer Schulen vnd kirchen in die  
Neun Jar lang trewlich vnd wol gedienet hat / In sonderheit  
hat er die lection Hebraeæ linguae in der Schulen diese zeit  
vber gehalten/vnd viel nutz damit geschaffe/wie jme dessen viel  
seiner

seiner junger gesellen/die von jme vnterweiset worden/mit der zeit gut zeugnis geben werden.

In seinem leben vnd wandel ist er ein fein eingezogener stiller frommer Man gewesen / zu allen sachen vnuerdrossen / vnd willig / Sein ampt war jme ein recht grosser ernst / Er lies sich nichts veruiehlen / Er schewete sich auch nicht die francken zu besuchen / in waserley franckheit sie auch waren / Vnd were aus dieser übung vnd erfahrung erst zu einem rechten Manne worden / wenn es des lieben Gottes wille gewesen were / das er lenger hette leben sollen.

Als er aber den xj. Julij / welcher war der Sonnabende für Margrethe / etwas vngeschickt worden / das in die jzt regierende heuptfranckheit angestossen / hat er gleichwol den folgenden Sonntag früe zur Metten seine gewöhnliche Predigt vorrichtet / vnd sich darnach niedergelegt. Den xv. Julij / am tage diuisionis Apostolorum / hat er sich doheime communiciren lassen / vnd sich zum seligen abschiede / aus diesem leben / gerüstet / wie er denn nach empfangung des hochwürdigen Sacraments vnsern lieben Herren Gott / herzlich gedancket für empfangenen trost / vnd vorsicherung seiner seligkeit / hat sich auch dem willen seines lieben Gottes ergeben / das es derselbe mit jme machen möchte nach seinem raht vnd veterlichem wolgefallen / vnd hat sich die ganze zeit vber / die vierzehnen tage / weil er donieder gelegen / in grosser gedult finden lassen / das man die regierung des heiligen Geistes beides an seinem beten vnd reden gespüret hat / Wie er zuuorn andere Christen / wenn er sie in schwachheiten besucht hat / auff die schönen heuptsprüche / Johan. 3. Also hat Gott die Welt geliebet. Esai. 53. Für war er trug vnser franckheit. Item auff den 23. 25. 31. Psalm geweisert hat / also hat er sie auch zu seinem eigenen trost selbs gebrauchet / vnd seinen Herren collegis / vnd andern / so in besuchet /



sucht // aus Gottes worte / sein vertrauen zu Gott offenbaret.  
Den donnerstag abend den 23. Julij / lies sichs etwas hart mit  
im an / Do wird er von dem herrn M. Friderich Rothen sei-  
ner vorigen trostsprüche erinnere / vnd werden im auch ange-  
zogen die wort S. Pauli / Philip. j. Christus ist mein leben.  
Item / Ich habe lust abzuscheyden / vnd aus dem 31. Psalm /  
In deine hende befehle ich meinen Geist etc. vnd darauß ge-  
fraget / Wenn in der liebe Gott ist abfordern wolte / ob er sich  
denn auch mit gedult in seinen willen ergeben wolte / hat er mit  
gefaltenen vnd auffgehobenen henden geantwortet / Ach wie  
herzlich begere ichs / wenn nur mein lieber Gott wolte.

Folgende nacht vnd den freitag vor mittage ist er gar  
stille worden / vnd da ime der spruch Johan. 3. Also hat Gott  
die Welt geliebet etc. wider fürgesaget / vnd er abermal gefras-  
get worden ist / ob er bey diesem trost / vnd der Lere / die er dar-  
aus andern fürgepredigt hette / bestendig bleiben / leben vnd ster-  
ben wolte / hat er seinem herrn collegæ darauß die handt ge-  
reicht / vnd Ja gesaget / vnd ist bald darauß in einer halben  
stunde sanfft vnd selig / wie in einem schlaff abgeschieden /  
Das also an ime erfüllet vnd war worden ist / das Christus  
sagt Johannis am achten / Warlich / warlich ich sage euch / so  
jemandt mein wort wird halten / der wird den Todt nicht ses-  
hen ewiglich / Gott verleihe ime vnd allen wahren Chris-  
ten / eine fröliche Auferstehung / vmb  
Christi Jesu willen / Amen.

ie  
is  
/s  
/e  
e  
r  
e  
s  
s  
s  
n  
/  
s  
o  
s




Ze 6/30 ~~OK~~

X2202728

n.v.





74

IV, 545

# Der Spruch des Apostels

Hebr: XIII,

Gedencket an ewre Lere etc.

Ausgelegt

# en der Christlichen

rebniß / des weiland Ehrwürdigen

volgelarten M. CHRISTOPHORI


Stauffenbuelß / Diaconi der Kirchen

S. Andrea zu Eißleben /

Durch

M. Hieronymum Mencelium

Superintendenten.



5

85.

Wittenberg /

Gedruckt durch Clementem Schleich.

